



**Ref.: OT-21-064**  
**Asunto: PRIMEIRA REVISIÓN DO PLAN FORESTAL DE GALICIA 2021-2040**  
**Promotor: CONSELLERÍA DE MEDIO RURAL**  
**Trámite: Informe previsto no artigo 54.9 da Lei 1/2021, do 18 de xaneiro, de ordenación do territorio de Galicia**

Mediante o oficio do 07/06/2021, a Dirección Xeral de Planificación e Ordenación Forestal remite a seguinte documentación relativa ao documento sinalado, aos efectos de continuar a súa tramitación consonte o disposto no artigo 54.9 da *Lei 1/2021, de 8 de xaneiro, de ordenación do territorio de Galicia*:

- Versión final da 1ª revisión do Plan Forestal de Galicia 2021-2040 “Cara á neutralidade climática”.
- Informe de modificacións trala resolución pola que se formula a Declaración Ambiental Estratéxica (DAE) e o informe desta dirección xeral do 28/05/2021 sobre o procedemento de tramitación a seguir, segundo á *Lei 1/2021, do 18 de xaneiro, de ordenación do territorio de Galicia*.

Corresponde á Dirección xeral de Ordenación do Territorio e Urbanismo a competencia para emitir o informe solicitado, de conformidade co previsto no artigo 54.9 da *Lei 1/2021, de 8 de xaneiro, de ordenación do territorio de Galicia*, en relación co disposto no artigo 13.1 do Decreto 42/2019, do 28 de marzo, polo que se establece a estrutura orgánica da Consellería de Medio Ambiente, Territorio e Vivenda.

Analizada a documentación achegada, e á vista da proposta realizada pola Subdirección Xeral de Ordenación do Territorio, emítese o seguinte informe sobre a *Primeira Revisión do Plan Forestal de Galicia 2021-2040*:

## 1. ANTECEDENTES

**1.1.** No ano 1992 aprobouse o Plan forestal de Galicia (PFG), instrumento que, de conformidade co previsto no artigo 72 da *Lei 7/2012, do 28 de xuño, de montes de Galicia*, estableceu as liñas de acción da política forestal galega así como os mecanismos de seguimento e avaliación necesarios para o seu cumprimento. Segundo a referida normativa autonómica, son instrumentos de planificación forestal o Plan Forestal de Galicia (PFG) e os Plans de Ordenación dos Recursos Forestais (PORF).

Segundo o previsto no número 2 do citado artigo 72, o Plan Forestal de Galicia terá a consideración dun programa coordinado de actuación, ao abeiro do disposto nos artigos 16 e seguintes da *Lei 10/1995, do 23 de novembro, de ordenación do territorio de Galicia*, e a súa aprobación e, no seu caso, modificación e revisión, axustarase ao procedemento previsto no artigo 21 da dita lei, actualmente derogada e substituída pola *Lei 1/2021, do 8 de xaneiro, de ordenación do territorio de Galicia*, sen prexuízo do previsto no seu réxime transitorio para os procedementos en tramitación.

**1.2.** O 09/06/2016 o Consello da Xunta acordou iniciar a formulación e a aprobación da Primeira Revisión do Plan Forestal de Galicia 2021-2040 (DOG do 23/06/2016).

**1.3.** O 31/10/2016 a Secretaría Xeral de Calidade e Avaliación Ambiental formulou o Documento de alcance do Estudo ambiental estratéxico.





**1.4.** O 27/06/2018 a Consellería de Medio Rural emitiu a Orde de aprobación inicial e apertura do trámite de información pública e audiencia aos concellos, entidades, corporacións e organismos públicos do instrumento sinalado e do seu estudo ambiental estratéxico polo prazo de 3 meses (DOG do 05/07/2018 e do 06/07/2018; e BOE núm. 162, do 5 de xullo 2018).

**1.5.** O 19/10/2018 esta dirección xeral emitiu o informe no trámite de audiencia previsto no artigo 21.1.d) da Lei 10/1995, do 23 de novembro, sobre o documento “Anexo actuacións PFG” remitido o 09/07/2018, no que sinalou unha serie de cuestións para corrixir na medida VI.1.2 relativa ao alcance dos Plans de ordenación dos recursos forestais (PORF), cuestións que constan integradas no documento agora remitido.

**1.6.** O 07/04/2021, a Dirección Xeral de Planificación e Ordenación Forestal remite o documento sinalado, aos efectos de continuar a súa tramitación, manifestando que a mesma documentación tamén foi enviada á Dirección xeral de Calidade Ambiental, Sostibilidade e Cambio Climático, en aplicación da *Lei 21/2013, de 9 de decembro, de avaliación ambiental*.

**1.7.** O 28/05/2021 emitiuse por esta dirección xeral un informe sobre o procedemento de tramitación a seguir segundo á Lei 1/2021, do 18 de xaneiro, de ordenación do territorio de Galicia, no que se sinalaban algunhas cuestións a ter en conta no documento que se sometera a aprobación definitiva.

**1.8.** O 22/06/2021 publicouse no DOG a Resolución do 2 de xuño de 2021 pola que a Dirección Xeral de Calidade Ambiental, Sostibilidade e Cambio Climático formula a declaración ambiental estratéxica correspondente ao procedemento de avaliación ambiental estratéxica ordinaria do PFG.

**1.9.** O 07/06/2021, a Dirección Xeral de Planificación e Ordenación Forestal remite a *Versión final da 1ª revisión do Plan Forestal de Galicia 2021-2040 “Cara á neutralidade climática”*, e o informe de modificacións tras a resolución pola que se formula a Declaración Ambiental Estratéxica (DAE) e o informe desta dirección xeral do 28/05/2021, solicitando o informe previsto no artigo 54.9 da *Lei 1/2021, do 18 de xaneiro, de ordenación do territorio de Galicia*.

Entre a documentación remitida, consta informe de participación e consultas no que figuran os informes sectoriais solicitados e emitidos, e como se tiveron en conta os condicionantes dos mesmos.

Neste punto, cómpre sinalar que, en relación ao informe emitido pola Dirección General de Aviación Civil, o mesmo sinala que non foron realizadas as incorporacións requiridas nun informe previo, do 17/04/2017, en particular, que deberán incorporarse ao documento os planos e disposicións sinalados no informe do 17/04/2017, así como os que figuran no Anexo I do informe do 25/10/2018.

En atención ao sinalado, antes da súa aprobación definitiva polo Consello da Xunta de Galicia, deberá darse cumprimento ao esixido no referido informe, e incorporar no documento os planos e disposicións indicados.

## **2. OBXECTO E DESCRICIÓN DO PLAN FORESTAL DE GALICIA**

**2.1.** O Plan Forestal de Galicia é o instrumento básico de planificación estratéxica da política forestal galega, no que se avalía a situación do monte galego e se establecen as directrices e programas de actuación da política forestal de Galicia, así como os mecanismos de seguimento e avaliación necesarios para o seu cumprimento: trátase dun plan director que establece os obxectivos, modelos, directrices, estratexias, plans ou programas, medidas e accións configurados conforme aos eixos de intervención,





instrumentos de execución e programas de actuación que se consideran necesarios para o seu desenvolvemento e aplicación en cumprimento dos seus fins.

A finalidade da 1ª Revisión do PFG, como instrumento de planificación estratéxica para o deseño e execución política forestal galega, é o seu deseño e configuración para proceder ao seu desenvolvemento adecuado de acordo coas características propias do monte galego e coas circunstancias e necesidades actuais, para poder responder ás demandas e tendencias emerxentes a nivel internacional, nacional e rexional, proporcionando para iso os instrumentos, medios e recursos necesarios para a súa execución e o cumprimento dos seus fins, ao obxecto de aproveitar as oportunidades que se presentan e alcanzar os retos de futuro que se propoñan para iso.

**2.2.** O ámbito competencial de aplicación da 1ª Revisión do PFG circunscríbese aos terreos que posúan a natureza legal de monte ou terreo forestal consonte a lexislación vixente, e ao aproveitamento, uso e xestión dos recursos e servizos forestais que se desenvolvan en ditos terreos.

**2.3.** O ámbito territorial de aplicación da 1ª Revisión do PFG está constituído polo conxunto do territorio forestal galego, cun carácter sectorial en materia de política forestal. Trátase dun plan director estratéxico para o deseño e execución da política forestal galega, que contempla disposicións de carácter netamente indicativo que carece de determinacións directas sobre a ordenación do réxime de usos do solo forestal, finalidade que se atribúe á figura legal de Plan de Ordenación dos Recursos Forestais (PORF) concibido para un ámbito supramunicipal, a nivel de comarca ou distrito forestal.

### 3. CONSIDERACIÓNS SOBRE A ORDENACIÓN DO TERRITORIO

**3.1.** O PFG ten a consideración dun instrumento de ordenación do territorio no seu ámbito territorial de competencia. Isto é, un instrumento de ordenación do territorio forestal, polo que deberá de ser compatible co resto de instrumentos de ordenación territorial vixentes que afecten a estes terreos. Non obstante, o PFG defínese estritamente como instrumento básico de planificación estratéxica da política forestal galega, polo que non adopta decisións relacionadas directamente coa ordenación do réxime de usos do solo forestal, nin tampouco coa ordenación e xestión territorial dos recursos forestais, sendo a dita territorialización desenvolvida a través dos plans de ordenación dos recursos forestais (PORF). Por conseguinte, pendente do seu desenvolvemento espacial a través dos PORF para verificar a compatibilidade co resto de instrumentos de ordenación do territorio vixentes, o único instrumento sobre o que cabe establecer a compatibilidade son as Directrices de ordenación do territorio (DOT), aprobadas definitivamente polo Decreto 19/2011, do 10 de febreiro.

**3.1.** As Directrices de ordenación do territorio de Galicia (DOT) inclúen, dentro das Determinacións para o desenvolvemento das actividades produtivas no medio rural, varias determinacións excluíntes que teñen relación co obxecto do Plan forestal. Concretamente, na directriz 3.3.5 sinálase que *a Xunta de Galicia fomentará os modelos de xestión forestal e promoverá actuacións que superen o grao de fragmentación extrema existente, priorizándoos en todo caso nos programas de fomento forestal desenvolvidos polas administracións competentes. Preferiblemente, ditos modelos basearanse na xestión conxunta dos aproveitamentos e apoiaranse en plans con enfoques territoriais integrados (Plans de Ordenación de Recursos Naturais, Plans de Ordenación de Recursos Forestais, Plans de Uso e Xestión) promovendo, entre outras, a produción forestal sustentable, as outras actividades agrarias presentes na*





*área, a calidade paisaxística, as función ecolóxicas e a prevención de riscos ambientais, nomeadamente os incendios forestais e as inundacións.*

*Asemade, na directriz excluínte 3.3.6., indícase que a Xunta de Galicia promoverá a Xestión forestal sostible, entendendo por tal a que contempla nas súas actuacións o equilibrio das funcións produtivas, sociais e ecolóxicas dos terreos forestais, para o que serán de aplicación os instrumentos de ordenación forestal, é dicir, os instrumentos de ordenación de todos os aproveitamentos de cada monte ou terreo forestal, segundo criterios técnicos e de sostibilidade.*

Varios dos eixos plan forestal que se está a tramitar alíñase co disposto nesta directriz: por exemplo, o Eixo I (contribución do monte galego á conservación da natureza e á prestación doutros servizos ambientais); o eixo Eixo II (protección, sanidade forestal e prevención e defensa contra incendios forestais) ou o Eixo III (xestión forestal e loita contra o abandono do monte), polo que enténdese que, nestes aspectos, o obxecto do plan alíñanse co disposto nas Directrices de Ordenación do Territorio de Galicia.

#### 4. CONCLUSIÓNS

**4.1.** De conformidade co sinalado no número 1.9. deste informe, antes da aprobación definitiva polo Consello da Xunta de Galicia da “Primeira Revisión do Plan Forestal de Galicia 2021-2040”, deberá darse cumprimento ao esixido no informe emitido pola Dirección Xeral de Aviación Civil, en particular, que deberán incorporarse ao documento os planos e disposicións sinalados no informe do 17/04/2017, así como os que figuran no Anexo I do informe do 25/10/2018.

**4.2.** En relación ás cuestións sinaladas no informe emitido por este centro directivo o 28/05/2021, constátase que foron subsanadas e incorporadas as mesmas no documento agora achegado, polo que infórmase favorablemente no que respecta ás competencias desta dirección xeral en ordenación do territorio e urbanismo.

**4.3.** De conformidade co disposto no artigo 61 da *Lei 1/2021, do 8 de xaneiro, de ordenación do territorio de Galicia*, logo da súa aprobación definitiva polo Consello da Xunta, deberá remitirse a este centro directivo un exemplar en soporte dixital do documento debidamente dilixenciado, facendo constar expresamente a súa aprobación, para proceder á súa inscrición no Rexistro de Ordenación do Territorio e Planeamento Urbanístico de Galicia.

**4.4.** Unha vez inscrito e para a súa entrada en vigor, de conformidade co artigo 60 da *Lei 1/2021, do 8 de xaneiro, de ordenación do territorio de Galicia*, no prazo de un mes dende a aprobación definitiva deberá publicarse no Diario Oficial de Galicia e na sede electrónica da Xunta de Galicia o acordo de aprobación definitiva e as súas disposicións normativas, así como a dirección electrónica na que poderá consultarse o contido íntegro do instrumento e os extremos esixidos pola normativa en materia de avaliación ambiental.

Santiago de Compostela, data da sinatura dixital  
A directora xeral de Ordenación do Territorio e Urbanismo  
M<sup>ra</sup> Encarnación Rivas Díaz





**XUNTA DE GALICIA**  
CONSELLERÍA DE MEDIO AMBIENTE,  
TERRITORIO E VIVENDA  
Dirección Xeral de  
Ordenación do Territorio e Urbanismo

Edificio administrativo San Caetano, s/n  
15781 Santiago de Compostela

galicia

CVE: IC0AA0smT6  
Verificación: <https://sede.xunta.gal/cve>



Xacobeo 21-22

